

pensées, & aux aduis de leurs charlatans qui sçauent se donner du crédit, & auxquels ils ont tant de croyance, que s'ils auoient obmis la moindre ceremonie de leur ordonnance, ils croiroient auoir commis une grande faute & s'en confesseroient miserables. Il me souuient à ce propos auoir leu dans Florimond de Remont, d'une certaine heresie ou fausse religion obseruée dans l'estat de Hollande (à mon aduis) qui permettoit à ses sectateurs de mettre en effet (s'ils pouuoient) tout ce qui leur venoit premier en fantaisie, fut honneste ou non conuenable, car disant le Sainct Esprit me l'a inspiré cela suffisoit pour se mettre en besongne, & Dieu sçait comme tout alloit au profit des maistres Milourds, & au contentement des malins esprits qui auoient là leur empire.

298 Aussi nos Sauuages reuans qu'il nous fallut faire mourir, il ne faudroit point d'autre arrest pour nous tous mettre à mort, car comme ie viens de dire ils croyent parfaitement leur songe, & ne veulent pas qu'on s'en mocque, ny d'aucune de leurs fingeries pour exorbitantes qu'elles soient, helas il y a assez de Chrestiens qui ne sont pas moins superstitieux, & qui adorent leurs pensées & leurs songes de la nuict, autant superstitieusement || que les Sauuages mesmes, de quoy font encore foy beaucoup de bonnes femmes, qui nous en demandent les explications, autant difficiles à donner qu'il y a de difficulté de croire les vaines propheties.

De quelque animal que soit le festin, la teste entiere est tousiours présentée au principal Capitaine, ou a un autre des plus vaillans de la troupe, pour tesmoi-